



АКАФИСТ
ПРЕПОДОБНОМУ ИОВУ
ИГУМЕНУ ПОЧАЕВСКОМУ



А К А Ф И С Т
Преподобному и Богословному
отцу нашему Иову,
игумену и чудотворцу
Почаевскому

Издание Свято-Успенской Почаевской Лавры
1991 год



По благославлению
Преосвященного Иакова
Епископа Почаевского

ТРОПАРЬ, ГЛАС — 4

Многострадальнаго праотца долготерпение стяжав, Крестителю воздержанию уподобляясь, Божественныя же ревности обою приобщаяся, тех имена достойно прияти сподобился еси, и истинныя веры был еси проповедник безбоязнен, темже монахов множество ко Христу привел еси, и вся люди в православии утвердил еси, Иове преподобне отче наш, моли спастися душам нашим.

КОНДАК, ГЛАС — 4

Явился еси истинныя веры столп, Евангельских же заповедей ревнитель, гордыни обличение, смиренным же представитель и научение, темже и ублажающим тя, грехов отпущение испроси, и обитель твою невредиму сохрани Иове, отче наш, многострадальному подобный.

ВЕЛИЧАНИЕ

Ублажаем тя, преподобне отче наш Иове, и чтем святую память твою, наставниче монахов, и собеседниче Ангелов.

КОНДАК — 1

Избранный чудотворче и земли нашае добрый учителю, всея же вселенная усердный молитвенниче, греподобне отче Иове, чистым твоим житием просвещаемая обитель твоя и вси православнии людие благодарственная о тебе Святей Троице возносят хваления. Ты же яко имеяй дерзновение ко Господу, предстатель буди о душах наших неусыпный и на страсти воинствующим скорый помощник, да в радости сердца зовем ти:

Радуйся, Иове, преславный угодниче Божий, и обители Почаевския украшение.

ИКОС — 1

Ангел благовестник воистинну явился еси нашим людем от врагов Церкви обуреваемым отче наш Иове, елико писанми твоими и книг священных печатанием, толико и богоугодным житием и славным еже к Богу отшествием, ныне же и всей вселенней предстатель теплый являешися у Престола Владычня: сего ради зовем ти:

Радуйся, истинная Церкви добрый воине:

Радуйся, православия светлый светильниче:

Радуйся, отцы наша от ереси оградивый:

Радуйся, чада их во благочестии утвердивый:

Радуйся, спасения ради дом родителей издетска оставивый:

Радуйся, о души твоей попечение паче всех показавый:

Радуйся, яко твоим отроческим подвигом старцы удивишася:

Радуйся, яко от юности во Ангельском образе к тем сопричтен был еси:

Радуйся, обитель Угорницкую твоим житием просветивый:

Радуйся, множайшими труды монастырь Дубенский прославивый:

Радуйся, немощных в вере утверждение:

Радуйся, неведущих вразумление:

Радуйся, Иове, преславный угодниче Божий, и
обители Почаевския украшение.

КОНДАК — 2

Видяще иноцы Угорництии ревностное твое в духовном житии преспеяние, схимонаха и пресвитера тебе быти устроиша, обаче Волинская земля на вящшия труды тя подвизаючи, устрои тебе игумена быти во граде Дубенстем ко отражению еретических поплзновений, православным же людям ко окормлению духовному и к неленостному Господеву воспеванию: Аллилуиа.

ИКОС — 2

Разум совершен воистинну отче показал еси, егда душевнаго ради устройства на гору Почаевскую уклонился еси и вместо начальствования послушанию паки предался еси, обаче в лучший того подвиг Господь тебе вменяше вторицею приятное zde игуменство, братия же Почаевстии зываху ти с веселием:

Радуйся, наш отче новый и предивный:

Радуйся, благочестия образе:

Радуйся, начальство, яко служение, приавший:

Радуйся, Богу и ближним волею поработивыйся:

Радуйся, яко в начальстве твоём Христова смирения подобие является:

Радуйся, яко того ради покой душам нашим обретается:

Радуйся, о людех доброе моление возносивый:

Радуйся, на демоны мужественно ополчивыйся:

Радуйся, Ангельскаго ликостояния приобщивыйся:

Радуйся, добрый путевождь ко спасению нам явивыйся:

Радуйся, спасающимся ободрение:

Радуйся, ленившимся обличение:

Радуйся, Иове, преславный угодниче Божий, и
обители Почаевския украшение.

КОНДАК — 3

Сила Духа Божественнаго обогати тя Иове премудре, егда татя монастырския пшеницы обличив, абие прощение тому даровал еси и утаенное паки ему возвратил еси покаяния его ради и алчущаго телесе насыщения, сие бо сотворив, окамененную умягчил еси душу и научил еси пети: Аллилуиа.

ИКОС — 3

Имеяй присное попечение о душе твоей отче подобне, возлюбил еси пещерное затворение, идеже дни и нощи в молитве провождая, единому Богу беседовал еси, темже и свет благодати его темную пещеру яко Фаворскую гору облиставаше и научаше всех взывати тебе:

Радуйся, молитвы непрестанное кадило:

Радуйся, слез неистощимый кладезю:

Радуйся, древним Киевопечерским затворником уподобивыйся:

Радуйся, тех благодатных дарования стяжавый:

Радуйся, яко молитвами твоими братия в терпении укрепляшеся:

Радуйся, яко воздыханми твоими демони от твоея обители отгнашася:

Радуйся, в темную пещеру небесный свет призывавый:

Радуйся, и в наша страстные души благодать от Господа приносящий:

Радуйся, скалы Почаевския твердейший адаменте:

Радуйся, вся страны наша пресветлый светильниче:

Радуйся, вселенския Церкви преславный столпе:

Радуйся, всех молящихся прибежище:

Радуйся, Иове, преславный угодниче Божий, и обители Почаевския украшение.

КОНДАК — 4

Бурю еретических находжений отгнати желая, был еси в Богоспасаемом граде Киеве со освященным Собором Православных, идеже неврежденную веру дерзновенно исповедал еси и к томужде вся люди увещевал еси, темже и священные книги тиснением предавати во обители Почаевстей не преставал еси, яко всем чтущим сия истинную веру содержати и православно пети Богу: Аллилуиа.

ИКОС — 4

Слышаша братие Почаевстии непрестанную молитву Иисусову, твоими усты глаголемую, отче Иове, слезы же из очию твоею текущия видеша и твоею учительною беседою назидующеся, образом же жития твоего умиляющеся, глаголаху:

Радуйся, молитвенниче наш предобрый:

Радуйся, учителю наш кроткий:

Радуйся, благодатныя слезы источай:

Радуйся, и наша сердца умиляй:

Радуйся, яко духовную жертву непрестанно ко Господу возносиши:

Радуйся, яко райская утешения во уме твоём присно предносиши:

Радуйся, Крестителя в воздержании подражателю:

Радуйся, многострадальнаго в долготерпении сорекователю:

Радуйся, тою обою дарований приобщивыйся:

Радуйся, Ангельскаго сослужения сподобивыйся:

Радуйся, нищих питателю:

Радуйся, скорбящих утешителю:

Радуйся, Иове, преславный угодниче Божий, и обители Почаевския украшение.

КОНДАК — 5

Боготечней звезде уподобился еси преподобне, обходя землю Галицкую и Волинскую, светом же пра-

вославия вся просвещая, ревнителем веры сугубую ревность внушая, добрых сердца в православии утверждая, ленивых же присно воздвизая к пению Богу: Аллилуиа.

ИКОС — 5

Видеша монаси и простии людие игумена Почаевския обители земли копанием и древес саждением и гноя собиранием себе смиряюща, яко другому Дамаскину дивляхуся, и всяку гордыню еретическую возненавидеша, в православии же души своя утверждаху, глаголюще:

Радуйся, доброго подвига вождю:

Радуйся, истинныя веры утверждение:

Радуйся, злочестивую гордыню еретиков обличаяй:

Радуйся, православное смиренномудрие возношаяй:

Радуйся, яко тобою красоту благочестия познахом:

Радуйся, яко тобою суету мирскую в себе попрахом:

Радуйся, богатым мира сего доброе вразумление:

Радуйся, нищим и трудником благое утешение:

Радуйся, крест лишений волею подъявый:

Радуйся, той крест наш носить пособствуяй:

Радуйся, Павла скинотворца последователю:

Радуйся, Христа Бога рабе благий:

Радуйся, Иове, преславный угодниче Божий, и обители Почаевския украшение.

КОНДАК — 6

Проповедник православныя веры и благочестия чрез все житие твое быв, Иове преподобие, сие святою кончиною твоею запечатлел еси, юже за седмицу предрекл, безболезненно по причащении Святых Таин, прияти сподобился еси, никакоже о мире сем жалея, но разрешитися хотя и со Христом быти, во

еже непрестанно воспевати Серафимскую песнь: Аллилуа.

ИКОС — 6

Возсия благолепною красотою мертвенное тело твое преподобие, еже бо в житии твоём постом и трудами сокрушал еси, тоежде Господь по успении твоём нетлением и благоуханием прослави, нас же пети тебе научи:

Радуйся, небес пресельниче:

Радуйся, и земли молитвенниче:

Радуйся, исхождение твое от земных предуведывый:

Радуйся, о том тепле возвеселивыйся:

Радуйся, яко и нас в безстрашии ко смерти утверждаеши:

Радуйся, яко упованию на милость Божию нас научаеши:

Радуйся, любителей временного живота обличителю:

Радуйся, будущего воскресения нетленный плотию свидетелю:

Радуйся, плоть свою в житии распинати поревовавший:

Радуйся, туюжде по смерти благоуханну явивый:

Радуйся, неверующих явное обличение:

Радуйся, надеющихся доброе утверждение:

Радуйся, Иове, преславный угодниче Божий, и обители Почаевския украшение.

КОНДАК — 7

Хотя Богъ о нетлении мощей преподобнаго Иова известити Церковь, трищи в сонном видении того являет митрополиту Дионисию, аки жива и волю Господню известующа, емуже веровав Дионисий прослави Вседержителя и угодника Его с песнию: Аллилуа.

ИКОС — 7

Новаго тя о вселенней предстателя и чудотворца
уведе освященный собор, монаси же и вси людие,
егда пришедшу Дионисию на гору Почаевскую и жи-
тие твое уведевшу, честное твое тело из недр земли
изнесется нетленно и благоухания исполнено, чудеса
же исцелений точаще, во еже вопити всем:

Радуйся, чудотворче новый и великий:

Радуйся, всех святых сопричастниче:

Радуйся, землю Волынскую погребением твоим
освятивый:

Радуйся, явлением мощей твоих в православии
нас утвердивый:

Радуйся, яко тобою исцеления хромии и слепии
приемлют:

Радуйся, яко твоего нетленного телесе демоны
трепещут:

Радуйся, и нас пред гробом твоим стоящих уми-
ления исполняй:

Радуйся, к желанию спасения нас подвизаяй:

Радуйся, аки живой, по смерти многим яви-
выйся:

Радуйся, небесным силам духом твоим приоб-
щивыйся:

Радуйся, чудес источниче:

Радуйся, на демоны нам крепкий помощниче:

Радуйся, Иове, преславный угодниче Божий, и
обители Почаевския украшение.

КОНДАК — 8

Странное и дивное чудо показал еси преподобие,
Иове, егда вскоре по прославлении твоём явился еси
посреде двою Ангелу моляся в Церкви Почаевстей
и плат миром исполненный девице некоей дал еси
возложения ради на раны болящему игумену Доси-
фею, той же исцеление прием абие к твоему гробу
здрав припадале, поя Богу: Аллилуиа.

ИКОС — 8

Весь еси воистинну обители твоя покров и заступление Иове преславне, сие бо православнии людие разумеша, егда ты на небеси узреша Богородице молящаяся о спасении святыя Лавры, монахов же и мирских человек, от агарян зело осаждаемых, но от того в радости тебе поющих:

Радуйся, всемогущий наш заступниче:

Радуйся, святыя обители стено неодолима:

Радуйся, нападения агарянская отражай:

Радуйся, стрелы на главы их возвращай:

Радуйся, яко умолил еси Ангельским Силам явитися к тем поражению:

Радуйся, яко многие агаряне ко Христу тогда привел еси:

Радуйся, ратники на обитель воюющая в послушники Ея претворивый:

Радуйся, непокоривыя беглецы сотворивый:

Радуйся, дерзости богоборныя посрамление:

Радуйся, терпения христианского увенчание:

Радуйся, упования еже на тя не посрамивый:

Радуйся, молитвенники твоя спасый и прославивый:

Радуйся, Иове, преславный угодниче Божий, и обители Почаевския украшение.

КОНДАК — 9

Всякая отступства и колебания в вере народом и обители твоею претерпенная, отпустив преподобный Иов, молитвами своими землю Волынскую ко православию возврати и в ней святыню Почаевскую твердейший оплот истинныя веры ныне являет, приходящим к ней тмочисленным людем, святыя же мощи его усты и сердцем целующим и поющим Богу: Аллилуиа.

ИКОС — 9

Ветии славы твоя явишася православнии архиереи и весь освященный собор, егда мощи твоя, от

отступник православия сокровенная, паки изнесоша во святую Церковь поклоняющимся христианом и в веселии глаголющим:

Радуйся, православныя Волыни солнце:

Радуйся, истинныя Церкви звездо:

Радуйся, заре правды нощи прешедшей возсиявшая:

Радуйся, луче, тьму ереси разгнавший:

Радуйся, в нове твоих мощей явлении паки чудеса источай:

Радуйся, тем отступление от православия в конец обличай:

Радуйся, яко моления верных исполняти не престал еси:

Радуйся, яко согрешения отец наших не помянул еси:

Радуйся, и нас врагом прощати научай:

Радуйся, и нас в долготерпении утверждай:

Радуйся, малодушных обличение:

Радуйся, кающихся прощение:

Радуйся, Иове, преславный угодниче Божий, и обители Почаевския украшение.

КОНДАК — 10

Спасения нашего буди и ныне ходатай Иове преподобне, зане многия растленныя обычаи нечестивии людие введоша во страну нашу и теми крепость наша оскуде, но в сокрушении сердец наших к твоему заступлению припадаем, на твое же предстательство уповающе, вопием Богу: Аллилуиа.

ИКОС — 10

Стена твердая православной веры в земле Волинстей и Галицтей чрез все житие твое был еси отче преподобне, но и по преставлении твоём явлением и исцелением за истину побораеши, еще же и невидимо душам чад твоих беседаеши, да вси вопием ти:

Радуйся, спасения нашего поборниче:

Радуйся, искушений злых отгнателью:

Радуйся, ко Господу дерзновение о нас стяжавый:

Радуйся, от Того благодать исцелений приявый:

Радуйся, яко со Ангелы в раи днесь водворяеши:

Радуйся, яко со Апостолы и мученики тамо ликуеши:

Радуйся, купно с ними о Церкви предстателю:

Радуйся, милосердия Божия к нам ходатаю:

Радуйся, кающихся еще в житии твоём возлюбивый:

Радуйся, ныне тех молитвы, яко фимиам к небесному Престолу возносяй:

Радуйся, и всех молящихся скорый слышателью:

Радуйся, смиренных сердцем покровителю:

Радуйся, Иове, преславный угодниче Божий, и обители Почаевския украшение.

КОНДАК — 11

Пение наше благодарное, от любви чистыя приносимое, прими угодниче Божий, якоже вдовицине лепте зане духовное имение наше нищетно пред тобою, благими же дела подражати тебе не возможем, но сокрушенная воздыхания о гресех наших приносяще, твоих добродетелей славою утешаемся, поюще Богу: Аллилуиа.

ИКОС — 11

Светильник православныя веры и столп благочестия был еси отче наш Иове, словом, житием, любовью, верою, чистотою, в них же и нас твоими молитвами укрепи, всякия же ереси и развращенныя обычаи от нас далече отжени, да благодарственное сотворим ти пение:

Радуйся, Божий избранниче:

Радуйся, Ангелов собеседниче:

Радуйся, и от нас духом любви твоея не отступивый:

Радуйся, и нам от духа твоего дарования разделяй:

Радуйся, яко зрящий нетленное тело твое на страсти телесная ополчаются:

Радуйся, яко чтущий о святем житии твоём, душу свою очистити тщается:

Радуйся, ревновати о своем спасении нас научай:

Радуйся, и ближних спасению служить нас подвизай:

Радуйся, ревностию о православии сердца наша распаляй:

Радуйся, покаянием о гресех души наша сокрушаяй:

Радуйся, духовного сна разгнателью:

Радуйся, духовныя бодрости подателю:

Радуйся, Иове, преславный угодниче Божий, и обители Почаевския украшение.

КОНДАК — 12

Благодать непрестанныя молитвы и о теле небрежения, радости же духовныя и к ближним сострастия обильно стяжал еси отче Иове темже и нас ленивых и грешных, тоя причастники сотвори твоими всемошными молитвами, да мучительства страстей избавльшися, воспоим Богу: Аллилуиа.

ИКОС — 12

Поюще твое дивное житие на земли и на небеси прославление, молим тя Иове преподобне: утверди молитвами твоими православную веру во стране тебе присной, всю же Христову Церковь на земли противу неверия и ереси защиты и укрепи, наша же не отвергни хваления сиевая:

Радуйся, Апостольскаго служения сопричастниче:

Радуйся, пустынноческих подвигов ревнителю:
Радуйся, нищеты духовный благодатный образ:
Радуйся, плача духовного богатый стяжатель:
Радуйся, яко кротостию твоею души татий и злодеев, аки наследие доброе Господу привел еси:

Радуйся, яко со всеми алкавшими и жаждавшими правды ныне во дворех Божиих насыщаешься:

Радуйся, от Бога со всеми милостивыми помилованный и прославленный:

Радуйся, со всеми чистыми сердцем лицом к лицу ныне Того созерцающий:

Радуйся, и нас от небесных с любовью называя:

Радуйся, всем о православии трудящимся помощь от Господа подавая:

Радуйся, обитель твою от всякого обстояния сохраняя:

Радуйся, и о всей вселенной молитвы Господу вознося:

Радуйся, Иове, преславный угодниче Божий, и обители Почаевския украшение.

КОНДАК — 13

О всеблаженне преподобне Иове, православная веры великий ревнителю и ереси твердый обличителю! Малаго сего моления от убогих сердец наших к тебе возносимаго не отвержи, но буди нам присный в вере и покаянии наставник, в подвизах благодатный помощник и пред Господом о спасении нашем неустанный молитвенник, о тебе вопиющих Богу: Аллилуиа.

Сей кондак читается трижды, потом снова читается икос — 1, потом кондак — 1, потом читается молитва.

МОЛИТВА ПРЕПОДОБНОМУ И БОГОНОСНОМУ ОТЦУ НАШЕМУ ИОВУ

О преподобне отче Иове, иноков трудолюбнаго жития Богомудрый наставниче, кротости и воздержания, чистоты и целомудрия, братолюбия и нищелюбия, терпения и бдения от ранней юности до поздней старости неутомимый подвижниче, веры православныя великий ревнителю и непреоборимый поборниче, земли Волынской и Галицкия светило Богосветлое и святые Почаевския обители непобедимый защитниче! Призри оком благоутробия твоего на нас недостойных чад твоих, к тебе усердно по вся дни прибегающих и на Боголюбивыя люди сия, пред твоими духоносными и многоцелебными мощами собравшиися и благоговейно к тем припадающия, и испроси предстательством твоим ко Всевышнему Владыце им и нам вся, яже к животу и благочестию, полезная и благопотребная: болящия исцели, малодушныя ободри, скорбящия утеша, обидимыя заступи, немощныя подкрепи и поверженныя долу возстави, всем вся, благодатию тебе от Бога данную, даруй по коегождо нужде и потребе, во спасение души и во здравие телу. Вознеси угодниче Божий всемогущую молитву твою да будет в стране нашей мир и тишина, благочестие и благоденствие, в судах правда и милость, в советех мудрость и благое преспеяние, да утверждается же во благих человецех верность, в злых же страх и боязнь, во еже престати им от зла и творити добрая, да тако в стране нашей Царство Христово растет и множится и да прославится в нем Богъ, дивный во Святых Своих: Ему же единому подобает всякая слава, честь и поклонение Отцу, и Сыну, и Святому Духу, ныне и присно и во веки веков. Аминь.

